

**PARLIMEN: Penjara Mandatori Bagi Perogol Gadis Bawah Umur - Nazri
Bernama
15 Oktober, 2012**

KUALA LUMPUR, 15 Okt (Bernama) -- Kerajaan telah memberi kebenaran kepada Jabatan Peguam Negara untuk meminda Seksyen 376 Kanun Keseksaan secepat mungkin supaya mereka yang didapati bersalah merogol gadis di bawah umur 16 tahun dijatuhkan hukuman penjara mandatori dan tidak boleh merujuk seksyen lain bagi meringankan hukuman.

Menteri di Jabatan Perdana Menteri Datuk Seri Mohamed Nazri Abdul Aziz berkata pindaan yang dicadangkan itu bertujuan supaya hukuman penjara mandatori di bawah Seksyen 376 dikekalkan, dan hakim tidak boleh mengguna pakai Seksyen 294 Kanun Tatacara Jenayah (Akta 593) yang memberikan mahkamah kuasa budi bicara dalam menjatuhkan hukuman.

"Ini termasuk mengeluarkan perintah bon berkelakuan baik sekiranya pesalah merupakan pesalah kali pertama, atau jika terdapat hal keadaan peringan, yang memberi gambaran bahawa undang-undang yang ditetapkan tidak dipatuhi," katanya ketika menggulung perbahasan Rang Undang-Undang Perbekalan 2013 peringkat dasar bagi Jabatan Perdana Menteri di Dewan Rakyat Isnin.

Mohamed Nazri berkata keputusan itu dibuat berikutan jumlah kes rogol melibatkan gadis bawah umur yang terlalu tinggi, selain bagi memelihara golongan tersebut daripada terdedah kepada jenayah berkenaan tanpa sebarang perlindungan.

"Sejak 2007 hingga Ogos 2012, terdapat 5,976 kes yang dibawa ke mahkamah untuk dibicarakan di bawah kesalahan rogol melibatkan gadis bawah umur 16 tahun. Dalam tempoh yang sama, terdapat 5,119 orang yang telah dituduh di bawah kesalahan itu," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=702156>